

LETRA DREJTUAR FILEMONIT

Përshëndetje

Pali, i cili gjendet në burg për hir të Jezusit, Mesisë, dhe vëlla Timoteu ia drejtojnë këtë letër Filemonit, bashkëpunëtorit tonë të dashur, ²si dhe motrës sonë (në fe) Apisë, bashkëluftëtarit tonë Arhipit dhe kishës që mblidhet në shtëpinë e Filemonit.

³Hir dhe paqe nga Perëndia, Ati ynë, dhe nga Jezusi, Mesia dhe Zoti.

Dashuria dhe besimi i Filemonit

⁴E falënderoj Perëndinë tim gjithmonë, o Filemon, kur mendoj për ty në lutjet e mia, ⁵sepse po dëgjoj për dashurinë tënde ndaj të gjithë besimtarëve dhe për besimin tënd te Jezusi, Mesia. ⁶Lutem për ty, që besimi që ke të përbashkët me të gjithë besimtarët e tjerë, të veprojë tek ti, e që ta dish se sa të mira mund të bëhen me anën tonë për nder të Mesisë. ⁷Për mua ishte gëzim i madh e mora zemër, vëlla, kur dëgjova për dashurinë që tregove ndaj bashkëbesimtarëve, dhe me të cilën i gëzove.

Pali ndërhyr për Onezimin

⁸Për këtë nuk dua ta përdor autoritetin tim; mund të të urdhëroja në emër të Mesisë se ç'duhet të bësh; ⁹por për të ushqyer dashurinë, vetëm po të lutem. Unë, Pali, plak dhe tani edhe i burgosur për hir të Jezusit, Mesisë, ¹⁰po të lutem për Onezimin. Këtu në burg e solla atë te besimi në Jezusin, Mesinë, dhe kështu ai u bë biri im. ¹¹Më parë ishte i pavlefshëm për ty, por tani mund të bëhet i vlefshëm për ty e për mua. ¹²Po e dërgoj përsëri tek ti – si të thuash – po të dërgoj zemrën time. ¹³Dëshiroja që të qëndronte tek unë. Atëherë do të mund të më shërbente mua në vend që të të shërbente ty, përderisa jam në burg për hir të lajmit të mirë. ¹⁴Por nuk desha të veprojë pa lejen tënde, sepse ti nuk duhet ta bësh një të mirë me detyrim, por ta bësh atë vullnetarisht.

¹⁵Ndoshta ishte i ndarë prej teje vetëm për një kohë, që të ta kthej përgjithmonë, ¹⁶sepse tani ai të vlen më shumë se një skllav, të vlen si një vëlla i dashur. Kështu është, para së gjithash, për mua, por edhe më tepër duhet të jetë për ty, si njeri i tillë që i takon Zotit!

¹⁷Në qoftë se jam vëllai yt në fe, atëherë pranoje atë si mua! ¹⁸Në qoftë se të ka bërë ndonjë dëm ose të ka gjë borxh, m'i ngarko mua të gjitha. ¹⁹Unë, Pali, po nënshkruaj me dorën time; unë do ta vë në vend, që të të mos kujtoj se edhe ti ke një borxh – jetën tënde. ²⁰Të lutem, vëlla i dashur, mendo për Zotin dhe ma bëj këtë nder. Gëzoje zemrën time siç duhet mes njerëzve që janë të lidhur me anë të Mesisë.

²¹Jam i sigurt se do ta plotësosh lutjen time. E di se do të bësh edhe më tepër sesa të lutem. ²²Më përgatit një banesë, sepse kam shpresë të patundur që Perëndia do t'i dëgjojë lutjet e tua dhe se do të më kthejë tek ti.

Përshëndetja e fundit

²³Të përshendet Epafra, i cili është me mua në burg për hir të Jezusit, Mesisë. ²⁴Gjithashtu, të bën të fala Marku, Aristarku, Dema dhe Luka, bashkëpunëtorët e mi.

²⁵Qoftë me ju hiri i Zotit tonë, Jezusit, Mesisë!